

**Agong, Permaisuri Tiba Di Beijing Untuk Lawatan Negara
Bernama
Sept 3, 2014
Daripada Balkish Awang**

BEIJING, 3 Sept (Bernama) -- Yang di-Pertuan Agong Tuanku Abdul Halim Mu'adzam Shah dan Raja Permaisuri Agong Tuanku Hajah Haminah berangkat tiba untuk lawatan negara selama tiga hari ke Beijing, China bermula Rabu.

Pesawat khas yang membawa pasangan diraja mendarat di Lapangan Terbang Antarabangsa Beijing Capital di sini pada 4.10 petang ini.

Keberangkatan tiba Seri Paduka berdua yang diiringi Menteri Pendidikan Kedua Datuk Seri Idris Jusoh selaku menteri pengiring serta pegawai kanan kerajaan, disambut Timbalan Menteri Luar China Qian Zhongshan, Duta Besar Malaysia di China Datuk Iskandar Sarudin dan Duta Besar China di Malaysia Huang Huikang.

Seri Paduka berdua turut menerima penghormatan daripada kawalan hormat terdiri daripada 36 anggota Angkatan Tentera China.

Lawatan Seri Paduka ke Beijing juga diiringi Tunku Temenggong Kedah Tan Sri Tunku Sallehuddin Sultan Badlishah dan anakanda Seri Paduka, Tunku Panglima Besar Kedah Tunku Puteri Intan Syafinaz.

Sementara itu Iskandar ketika ditemui Bernama dan RTM di pejabat Kedutaan Besar Malaysia di sini berkata lawatan Yang di-Pertuan Agong dan Raja Permaisuri Agong ke China merupakan undangan daripada Presiden China Xi Jinping selain membalas lawatan Xi ke Malaysia pada Oktober tahun lepas.

Beliau berkata lawatan Seri Paduka berdua juga bersempena sambutan ulang tahun ke-40 hubungan diplomatik Malaysia dan China yang bermula pada 31 Mei, 1974.

Katanya lawatan Yang di-Pertuan Agong dan Raja Permaisuri Agong itu bertujuan mengeratkan hubungan dua hala antara Malaysia dan China yang terjalin lebih 700 tahun lalu dan secara diplomatik terjalin selama 40 tahun.

"Kita mengharapkan lawatan ini dapat mengeratkan lagi hubungan antara dua negara yang mana Malaysia merupakan negara anggota Asean yang mempunyai hubungan dialog yang dinamik, progresif dan aktif dengan China," katanya dan menambah kali terakhir ketua negara mengadakan lawatan ke China adalah pada 2005.

Duta itu berkata sepanjang lawatan Tuanku Abdul Halim dan Tuanku Hajah Haminah di sini, pasangan diraja itu akan mengadakan pertemuan dengan Xi dan isterinya Peng Liyuan serta menghadiri jamuan negara pada petang esok bersama Presiden China di Great Hall of

The People.

Yang di-Pertuan Agong juga akan menerima menghadap Perdana Menteri China Li Keqiang pada Jumaat.

Iskandar berkata Yang di-Pertuan Agong dan Raja Permaisuri Agong berkenan menghadiri majlis makan malam bersama rakyat Malaysia yang bermastautin di Beijing.

Seri Paduka berdua akan berangkat ke Hangzhou pada Sabtu untuk meneruskan lawatan selama tiga hari di sana.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1065732>